


**Ka Mopresidente
Henry B. Eyring**
Mogakolodi wa Ntsha mo
Bopresidenteng jwa Ntsha



Bopelokgale jwa Tshiamo

Nngwe ya mesola ya botshelo jwa senama ke go itshupa fa pele ga Modimo gore re tlaa tshegetsela melao ya Gagwe fa seo se tlhoka bopelokgale.

Re pasitse teko eo mo lefatsheng la semowa. Mme bongwe mo borarong jwa mophatlo wa legodimo o ganne thulaganyo ya gore ba lekiwe mo bonnong jwa senama mo go nang le kgaonagalo ya gore ba ka palelwa.

Pele ga re tsholwa, re ne re itse Modimo Rara le Morwae, Jeso Keresete, ka sebele. Re ne re kgona go ba bona le go ba reetsa jaaka ba ne ba re ruta e bile ba re kgotlhatsa. Jaanong lesire le beilwe godimo ga tilhaloganyo le kgakologelo tsa rona. Satane, rara wa maaka otlhe, o na le botlhale go re feta ka gore re tshwanetse ra bona bonnete jwa gore re bomang ka matlho a tumelo, fa mebele ya rona yone e re dira gore re gatelelwe ke thaelo le bokoa jwa senama.

Re na le thuso e ntsi go re fa kgotlhatso mo lefatsheng le. E e kgolo go di gaisa ke Tefo ya ga Jesu Keresete. Ka ntsha ya se a se dirileng, dibe di ka tlhatswiwa ka metsi a kolobetso. Re ka ntshafatsa tshegofatso eo fa re tsaya selalelo ka tumelo le ka pelo e e boikotlhao.

Dimpho tsa semowa ke thuso e nngwe gape. Re fiwa Mowa wa ga Keresete ka matsalo. Se se re fa maatla go itse fa tshono e beilwe fa pele ga rona e e ka re gogelang go botshelong jo bo sa khutleng. Lefoko la

Modimo ke tshupa-tsela e e tsepameng fa re le bala le Mowa yo o Boitshepo e le mopati wa rona.

Mowa yo o Boitshepo o re letlelela go supa malebogo le go kopa thuso mo thapelong ka mokgwa o o tlhapi-leng le ka tshepo e re kileng ra bo re e akola le Rraetsho kwa legodimong le e re tlaa nnang le yone fa re boela kwa go Ene. Puisanyo eo le Modimo e thusa go tlosa letshogo mo dipelong tsa rona jaaka e aga tumelo le lorato lwa Rraetsho kwa Legodimong le Jesu Keresete.

Boporisita jo bo boitshepo bo re fa kgotlhatso mo tirelong ya rona. Mo ditlhomong tsa jone re amogela maatla go direla bana ba Modimo le go ema kgalhanong le thaelo ya bosula. Fa a re bitsa go direla, re na le tshepiso e: “Mme yo o tlaa le amogelang, foo ke tlaa bo ke le teng, gonne ke tlaa tsamaya pele ga difatlhego tsa lona. Ke tlaa bo ke le mo mojang le mo molemeng wa lona, le Mowa wame o tlaa bo o le mo dipelong tsa lona, gape baengele bame ba tlaa lo dikaganyetsa, go le tshegetsela” (D&D 84:88).

Moporofite Joseph Smith mo tirelong ya gagwe o ne a na le mabaka go ka tlala letshogo. Mme Modimo o mo file bopelokgale ka tshepiso e ya sekai sa Morena:

“Le fa o ka latlhelwa mo mosimeng, kgotsa mo dialteng tsa babolai, le katlholo ya loso ya lebana le wena; fa o ka latlhelwa lewatleng; fa matsubutsubu a ka itaya kgalhanong le wena; fa diphefo tse di boitshegang di

ka nna mmaba wa gago; fa magodimo a ka kokoana bontsho, le dilo tsotlhe tsa ipopa go go kganela tsela; le godimo ga moo, fa legano la dihele ka sebele le ka go atlhamela, itse se, morwaake, gore dilo tse tsotlhe di tlaa go fa botlhale, e bile di tlaa go siamela.

“Morwa Motho o di bone tse tsotlhe. A o mogolo go na le ene?” (D&D 122:7–8).

Modimo o re file go le gontsi go feta selekanyo go thusa go nyeletsa letshogo le go re kgotlhatsa, go sa kgatlhalesege gore re lebagane le eng mo botshelong. Jaaka re atlarela thuso ya gagwe, o ka re tsholetsa go fitlha botshelo jo bo sakhutleng jo re bo senkang.

GO RUTA GO TSWA MOLAETSENG O

Jesu Keresete, Moruti Morena, o boditse kgapetsa dipotso go kgotlhatsa batho go akanya ka boteng le go dirisa melawana ea neng a e ruta. . . .Dipotso tsa gagwe di ne di gwetlha kakanyo, tshekatsheko-mowa, le maitlamo” (*Teaching, No Greater Call* [1999], 68). Akanyetsa go aga le go botsa dipotso di le mmalwa go thusa batho go tlhaloganya le go dirisa nnete e e rutwang mo molaetseng o. Sekai, o ka botsa, “Ke thuso efe e Modimo a go e fileng go nyeletsa letshogo le go go fa kgotlhatso?” kgotsa “Modimo o go thusitse jang go fenyela letshogo la gago?” Kgotlhatsa batho go akanya ka boteng dikarabo tsa bone pele ba ka araba.

BONANA

Ga go Ope yo o Senang Bokoa

Ka Shauna Skoubye

Ga ke bolo go eletsa go nna jaaka Nefae: go obamela ka kelelo, go dumela fela thata, le go nna semowa mo go tseneletseng. Mo matlhong ame Nefae e ne e le sekai go gaisa botlhe, sa tshiamo. Dilo di le mmalwa di nkgatlhile, go feta le yone kakanyo ya go gola go nna fela jaaka ene—kgotsa segolo go simolola go nna le lemnyana fela la bogaka jwa gagwe.

Tsatsi lengwe ke ne ke na le mathatanyana, a bakilwe ke maikutlo a go tlhabela. Ke ne ke na le ditiro tota le maitlamo a mantsi thata. Mme ke ne ke lebege fela ke sa ye gope. Ka dikeledi tsa go tlhoka tsholofelo, ke ne ka ntshetsa maikutlo a mo go ntate. Gone foo o

ne a emelela, a tsamaela fa mabeelong a dibuka, a bo a goga nngwe ya dikgatiso tsa gagwe tsa Buka ya ga Momone. Ntle le go bueng lefoko, o ne a e bulela kwa go 2 Nefae 4 a bo a simolola go bala temana 17

Ke ne ka betswa ke bana ba phefo mo mmeleng o kare motlakase jaaka ke ne ke reeditse mafoko a maatla a: “A monna wa khutsafalo o ke leng ene!” Dikakanyo tsame di ne tsa tlaa kwa le kwa. Ga tla jang gore Nefae, mogaka wame le sekai, a re ke “monna wa khutsafalo”? Fa e le gore ke monna wa khutsafalo, seo se ntira eng?

Gape, motlakase o ne wa ragoga mo mmeleng wame jaaka ntate a ne a bala temana 28: “Tsoga, mowa wame! Se tlhole o akgega sebeng.” Go ne go utlwala mo go nna ekare maru a mantsho a a neng a le mo tlhogong yame a ne a phatlalala go senola bothito le bontle jwa loapi le le tala le le bulegileng, le letsatsi le le phatsimang. Ga go kgonege go tlhalosa tsela e temana e e sedimositseng mowa wame ka teng. Ditemana di mmalwa tsa lefoko la Modimo tse di ntladitseng ka tsholofelo, tshedimoso, le boitumelo jaaka e e dirile.

Mo temana 30, Nefae o buile sone tota se ke neng ke se akantse, fela o ne a dirisa mafoko a a tlhapileng: “Mowa wame o tlaa ipela mo go wena, Modimo wame, le letlapa la pholoso yame.” Temana e e ntsiseditse maikutlo a kagiso le malebogo ka bopelotlhomogi jo bo bonolo le lorato lwa Morena.

Ntate o ne a tswala buka a bo a tlhalosa fa ditemana tse fa gongwe di bidiwa pesalema ya ga Nefae. Go tswa foo o ne a nthuta ka bonolo gore le bagaka tota ba lefatshe ba na le makoa, le gore batho ba ba tshwanetse ba lemoga makoa a bone eseng jalo ba ka nna boikgogomoso gape, jalo, ba ka se nne bagaka.

Ke ne ka tlhaloganya. Fela ka gore ke ne ke na le makoa go ne go sa reye gore ke ne ke sa kgone go nna jaaka Nefae. Go lemoga makoa ame go ne ga nkatame-tsa gaufi le mofuta wa boNefae. Nefae o ne a le mogaka ka gore, go kopana le go obamela le go dumela, o ne a le boikokobetso e bile a eletsa go amogela makoa a gagwe.

Fa e sale tiragalo eo, ke ne ka somarela mafoko a a ga Nefae. Nako nngwe le nngwe fa ke a bala, ke tlelwa ke kakabalo le tshedimoso ele ya lantlha ke a bala. Ditemana tse di nkopelela gore ke ngwana wa Modimo, ke na le bokgoni go diragatsa go le gontsi thata go na le se ke se akanyetsang. Ke itse gore fa ke ka tshwarelela ka tumelo e bile ka gatela pele, masego a a sa buiweng a nkemetse.

Dimpho tse di re fang Kgotlhatso

Mopresidente Eyring o re bolelela ka ga dimpho di le mmalwa tse di re fang kgotlhatso. Bala temana nngwe le nngwe fa tlase, o bo o kwala leina la mpho mo phatlheng. Bua le ba lelwapa la gago ka tsela e mpho eo e ka go fang kgotlhatso.

1. Ditiro 22:16 _____
2. 2 Nefae 4:15 _____
3. D&D 59:8–9 _____
4. 2 Nefae 32:5; Johane 14:26–27 _____
5. 1 Bathesaloni 5:17 _____

Go Tiisa Tumelo mo Modimong Rara le Jesu Keresete ka go Ithuta Lefoko le le Boitshepo ka Bobosi



*Ruta mafoko a a
boitshepo le dinankolo
kgotsa, fa go tlhokafala,
molawana o mongwe*

*yo o tlaa segofatsang bakaulengwe ba
o ba etelang. Fa bopaki ka dithuto.
Laletsa ba o ba etelang go abelana
maikutlo ka se ba se ithutileng.*

“Fa ke sale mosha lenyalong, . . . ke ne ka lalediwa dijo tsa motshegare tsa bomme botlhe ba Mokgatlo wa Thuso mo lekalaneng la rona ba ba badileng Buka ya ga Momone kgotsa buka nngwe e e khutshwane ya ditso tsa Kereke. Ke ne ke setse ke le boitseme mo go baleng lefoko le le boitshepo, jalo ke bone tetla ya go ya bokopanong joo fela ka go bala buka e e khutshwane ka gore go ne go le motlhofo gape go tsaya nako e e khutshwane. Fa ke ntse ke ja dijo tsame, ke ne ka nna le maikulto aa bokete gore buka e ke e badileng e ne e siame, ke kabo ke badile Buka ya ga Momone. Mowa yo o Boitshepo o ne o nkgogela go fetola mekgwa yame ya go bala lefoko la Modimo. Lone tsatsi leo ke ne ka simolola go bala Buka ya ga Momone, e bile ga ke ise ke emise. . . . Ka gore ke ne ka simolola go bala tsatsi le letsatsi, ke ithutile ka Rraetsho kwa Legodimong, Morwae Jesu Keresete, le se ke tlhokang go se dira go nna jaaka Bone. . . .

“ . . . Mosadi mongwe le mongwe

o ka nna motlhatlhedi wa efangeli mo lwapeng lwa gagwe, gape mme mongwe le mongwe mo Kerekeng o tlhoka kitso ya efangeli ka e le moeteledipele le morutuntshi. Fa o ise o tlhabolole mोगwa wa go bala lefoko lwa Modimo, simolola jaa-nong e bile o tswelele go kgona go ipaakanyetsa maikarabelo a gago mo botshelong jo le jwa bosakhutleng.”¹

Julie B. Beck, Moporesidente wa Kakaretso wa Mokgatlo wa Thuso.

“Tshekatsheko ya lefoko e tlaa thusa bopaki jwa rona le jwa ba bangwe ba malwapa a rona. Bana ba rona gompiano ba gola ba dikaganyeditse ke mantse a a ba raelang go latlha se se siameng le go latela, mo boemong, menate ya lefatshe. Fa ese re ka nna le motheo o o tsepameng mo efangeling ya ga Jesu Keresete, bopaki jwa nnete, le maitlamo go tshela ka tshiamo, ba tsile go raelesega motlhofo ke dilo tse. Ke maikarabelo a rona go ba thatafatsa le go ba sireletsa.”²

Moporesidente Thomas S. Monson.

“Re batla bakaulengwe ba rona go nna baithuti ba lefoko. . . . Le tlhoka tsalano le boammaaruri jwa gagwe jo bo sa khutleng ka ntlha ya botsogo jwa lona, le ka ntlha ya go ruta bana ba lona le ba bangwe ba ba tlang mo tlhokomelong ya lona.”³

DITHUSO TSA THUTO YA KETELO

Mo ketelong ya gago, araba dipotso e bile o amogane tshedimoso o dirisa lefoko le le boitshepo. Fa bopaki ka fa go bala lefoko go thatafaditseng tumelo ya gago ka teng. Kopa mokaulengwe yo o mo etelang go amogana ka fa go bala lefoko la Modimo go thatafaditseng motse le lwapa lwa gagwe ka teng.

IPAACKANYO YA GAGO

Johane 5:39

2 Timothy 3:14–17

2 Nefae 9:50–51; 31:20; 32:3–5

D&D 138:1–11

“Re batla gore malwapa a rona a segofadiwe ka bakaulengwe ba baithuti ba lefoko— o nyetswe kgotsa o sa nyalwa, o le monana kgotsa mogolo, o le motlholagadi kgotsa o nna le balwapa. Nnang baithuti ba tlhwatlhwa ba lefoko le le boitshepo—eseng go isa ba bangwe ko tlase, mme go ba tsholeletsa godimo!”⁴

Moporesidente Spencer W. Kimball (1895–1985).

DINTLHA

1. Julie B. Beck, “My Soul Delighteth in the Scriptures,” *Liahona*, Motsheganong 2004, 107–9.
2. Thomas S. Monson, “Three Goals to Guide You,” *Liahona*, Ngw. 2007, 118.
3. Spencer W. Kimball, “Privileges and Responsibilities of Sisters,” *Ensign*, Ngw. 1978, 102
4. Spencer W. Kimball, “The Role of Righteous Women,” *Ensign*, Ngw. 1979, 102.

© 2010 ka Intellectual Reserve, Inc. Tetla tsothle di beilwe. E gatisitse mo USA Tetla ya Sekgoa: 6/09. Tetla ya Thanolo: 6/09. Thanolo ya *Visiting Teaching Message*, March 2010. Tswana. 09363 763